

హెబ్రీయులుకు రాసిన పత్రిక హెబ్రీయులుకు రాసిన పత్రిక అగరో కొత

హెబ్రీయులు పుస్తకం ప్రోత్సాహకరమైలా పత్రిక. యెడ యేసు బడంచ పుర్ననిబందన ప్రవచనాలుకు క్యాకిరి నెరవేర్చిసో దిగిపించిలీసి. యెడ ఉపన్యాసం పనికిరి రాసివురో యీసి. హెబ్రీయులురె పుర్న నిబందన గురించి 60 కు ఉంపరె ప్రవచనాలు అచ్చె. యెడానె యేసురె క్యాకిరి నెరవేరిసేయో ఇంకా యూదునెరొ ప్రదానయాజకుడురొ విదులుకు స్పష్టముగా దిగిపించిలీసి. యే కారనంగా యూదు క్రైస్తువులుకు ప్రోత్సహించితె యే పుస్తకం ఉద్దేసించబడిసి. యేసు దర్మసాస్త్రముకు క్యాకిరి పూర్తి కొరిసో, నడ ద్వారా యాజకునె ఇంకా బలీనె అర్పించిలా అవసరం నీకుంటా హెబ్రీయులు పుస్తకమురె దిగదివ్వె. యేసు సొబ్బి పాపొనెకు, ఇంకా సొబ్బి కలోనుకు గుట్టెబెల్లాక బలి అర్పించిసి. అం కల్రె క్రైస్తువులు కూడా పురువుంపరె నమ్మకం దీగివ్వరొ ఇంకా తా ఉంపరె నమ్మకముకు సాద్యం కొర్లా మనమగా యేసుక్రీస్తుకు అనుసరించితె హెబ్రీయులుకు రాసిలా పత్రికరె ప్రోత్సాహముకు పొందివొచ్చు 12:21.

హెబ్రీయులుకు రాసిలా పత్రిక కేసె రాసిసేవో కాకు తెలిసిని. ఈనె పండితులు అపోస్తలుడైలా పౌలు, లూకా నీనే బర్నబా రాసికిరి రొవ్వొచ్చుబులి కొయిసి. ఇంకా రాసిలా తారీకు కూడా తెలిసిని గని, క్రీస్తు జొర్నొకు 70 బొచ్చురొనె అగుంతాక యెడ రాసికి రొవ్వొచ్చు బులికిరి బడేలింకె నమ్మితోసి. కైంకిబుల్నే క్రీ.స. 70 రె యెరూసలేము నాసనమైసి. ఈనె యే పత్రిక రాసిలాలింకె యెరూసలేము గురించి ఇంకా నాసనం యీలాని. హెబ్రూ పుస్తకం రొము పట్టుమురె రాసిసె 13:24 ఈనె మరి యెడ బడే సంగాల్రె ప్రసారమైసి.

సంగతినె

1. పురువురో ప్రవక్తానె ఇంకా దేవదూతనెకన్నా యేసు గొప్పిట బులి రచయిత దిగదీసి **1:1-4:13**
2. యెట్టె సెయ్యె యెరూసలేమురె పురువు మందిరంరె సేవకొల్లా యాజకూనెకన్నా యేసు గొప్పిటబులి దిగదూసి **4:14-7:18**
3. పురువు మోసేకు దిల్లా దర్మసాస్త్రం ద్వారా పురువు తా ప్రజానెసంగరె కొరిగిల్లా పుర్న ఒప్పుందం కన్నా యేసు పరిచర్య గొప్పిట **8:1-10:31**
4. యేసు సొబ్బివిదాలుగా గొప్పిట బులి వివరించిలా తర్వాతరె, రచయిత బడే ఆచరనాత్మకమైలా నూచనలు దూసి **10:32-13:17**
5. ఆకరుగా రచయిత కుండె ప్రోత్సాహకమైలా కొతానె సంగరె ఇంకా సుబాకాంక్షలు సంగరె పత్రికకు పూర్తి కొరిసి **13:18-25**

తా పో ద్వారా పురువు కొతలగువురో

¹ పూర్వకలై బడే సమయాలై బడే విదాలుగా పురువు ప్రవక్తానె ద్వారా అం పితరులు సంగరె కొతాలగిసి.

² ఈనె యే కలై చివరగా తా పోకు సొబ్బిటంపరె వారసుడుగా నియమించిసి. తా ద్వారా ప్రపంచముకల్లా కొరిసి.

³ సెయ్యె పురువు మహిమ దీకిరి తేజస్సుకు, సెయ్యె దైవత్వము గల్లా పోలిక పిందిగీకిరి, తా సక్తిగల కొతాదీకిరి సొబ్బిటుకు నిర్వహించికిరి మనమానొ పాపం వినయమురె కృమించిలాటైకిరి సొబ్బిటంపరె అదికారి యీకిరి, తంకె కన్నా కెత్తో స్రేష్ఠమైకిరి, రొల్లా పరలోకంరె గొప్పతా యీలా పురువురో బత్తోకైలా అత్తోఆడుకు బొసిరిసి.

పో దూతలు కన్నా గొప్పతా

⁴ పురువు తా పోకు దేవదూతలకన్నా కెత్తో స్రేష్ఠమైలా నా దీసి. సే నా సొబ్బిటకన్నా గొప్పిట.

⁵ ఈనె పురువు తా దూతానె సంగరె కొయిలాసి.

తువ్వు మో పో,

మియ్యి ఆజి తొత్తె బో యించి.

మియ్యి తొత్తె బోబులి

ఇంకా సెయ్యె మెత్తె పోబులికిరి.

6 ఈనె పురువు తా అగుంతా పోకు

యే లొకొకు ఇంకా పొడదిల్లాబెల్లె

పురువురొ దూతలల్లా తాకు

నమస్కారము కొరిమంచిబులి కొయిలీసి.

7 ఈనె తా దూతానె ఆత్మ యికిరి,

తా సేవకునెకు నియ్య జోలానెగా కొరిగిల్లాట బులి

తా దూతానె గురించి కొయిలీసి.

8 ఈనె తా పో గురించి

ఈనె పురువు తో సింహాసనము కెబ్బుకూ తాసి,

తో పరిపాలన తో ప్రజానెకు న్యాయమైలాటగా *తాసి బులిసి.

9 తువ్వు నీతికి ప్రేమించికిరి దుర్నీతికు ద్వేసించును

సడకాక పురువు తో తోటిలింకెంపరల్లా

తొత్తె హెచ్చించిలాపనికిరి

ఆనందపొడిలాపనికిరి ఏర్పర్చిగిచ్చి.

10 ఈనె ప్రబూ తువ్వు ఆదిరాక బూమికి పునాది పొగిను.

మెగొనంకా తో అత్తొనె సంగరాక కొరిసు.

11 సడ అంతం యిజూసి ఈనె తువ్వు తాసు.

సడానల్లా కొన్నానెపనాక పుర్నయిజెవొ.

12 చొక్కావనాక సడకు మడిచిపూసు.

సడకు కొన్నవనాక మార్చిపీవు ఈనె

తువ్వు కెబ్బుకూ గుట్టెవనాక తాసు.

తో బొచ్చొరోనె తగ్గినింతె బులి కొయిలీసి.

13 ఈనె మియ్యి తో సత్తువనెకు

తో గొడ్డోనెకు పిడచెక్కవనికిరి కొల్లాజాంక

* 1:8 పురువాక తొ రాజ్యం

మోబత్తో కైల అత్తో ఆడుకు బొసురొబులి

తా దూతానె సంగరె కా గురించి ఈనెన్నా కెబ్బెనన్నా కొయిలాని.

14 ఈనె ఉంచినె యే దేవదూతానె కేసెబుల్నె పురువుకు సేవకొరిలా ఆత్మానెగా రక్సన పొందిలాలింకు పురువు పొడదిల్లా పరిచారకుల్లెకిరి అచ్చొ.

2

గొప్ప రక్సన

1 నడకు అమె అగుంతా సునిలా సంగతీనెకు నడదీకిరి నాత్పిజీకుంటా తాండ్రొ వినయాలై బడే జాగర్త కలిగికిరి రొమ్మంచి.

2 కైంకిబుల్నె దేవదూతానె సంగరె అం పూర్వికులుకు దిల్లా వాక్యము సత్యమైలాట. నడకు అంగీకరించికిరి నాచలిగిల్లాలింకె నడకు తగిలా సిక్స పొందిగివ్వె.

3 ఎత్తె గొప్ప రక్సనకు అమె నిర్లక్యము కొర్నే క్యాకిరి తప్పించిగీపారొ? సా రక్సన ప్రబువు బోదించిలందరె ఆరంబమైకిరి, తంకెదీకిరి కూడ సున్లాలింకెదీకిరి అముకు సొత్తోబులికిరి నిర్పాపించబోడిసి.

4 పురువు తా చిత్తందీకిరి అద్భుతానెదీకిరి ఆచ్చర్యకార్యాలుదీకిరి బడే పరిసుద్ధాత్మ వరాలు సంగరె తా సాక్సం దీసి.

అముకు రక్సన బిత్తురుకు సలిపించిలాట

5 అమె కొతాలగితల్లా యే లోకం బుల్నె అయితల్లా సే లోకముకు పరిపాలించితె పురువు తా దూతానెకు అదికారం దిల్లాని.

6* ఈనె జొనె గుటెపక్కరె యాకిరి ద్రుడముగా సాక్స్యం కొయిలీసి. ఓ దేవా తువ్వ మనమకు జ్ఞాపకము కొరిగితై సెయ్యె కేపాటీట.

సాదారనమైలా మనమకు దరిపించిగితై కేపాటీట.

7 తువ్వ తంకు దేవదూతనెకన్నా కొంచెము తక్కువగా కొరిసు.

మహిమ గౌరవం సంగరె తాకు కిరీటం లొగిసు.

8 తో అత్తోపైటంపరె తంకు అదికారం దీసు.

* 2:6 కీర్తన, 8; 4-6

తా గొడ్డొనెతోల్లె సొబ్బి రొయిదీను.
 సెయ్యె సొబ్బి లోపర్చిలాబెల్లె తంకు
 నాలోపర్చికుంటా కేటకు సడదిల్లాని.
 ఉంచినె అమె సొబ్బి తాకు

లోపరచబొడువురో ఇంకా దిగిలానింతో.

9 ఈనె పురువురో క్రువవలరె సెయ్యె ప్రతి మనమ కోసం మొర్నొ అనుబవించిలపనికిరి దూతానెకన్నా కుండె తక్కువలింకెపనికిరి కొల్లా యేసు మొర్నొ పొందిలా వల్లరె మహిమా ప్రబావము దీకిరి కిరీటం పిందిలాపనికిరి తాకు దిగిలింజొ.

10 కా నిమిత్తము సొబ్బి అచ్చొ కా వలరె సొబ్బి కలిగిలీసా సెయ్యె బడెలింకయిలా పోనుకు మహిమకు దన్నెతందుకు తా రక్సనకర్తకు కొన్టొనె ద్వారా సంపూర్నుడుగా కొరితె తాకు ఇష్టమైసి.

11 పరిసుద్దం కొరిలాలింకు పరిసుద్దం యీలాలింకు సొబ్బిలింకు జొన్నాక బో. యే కారనం దీకిరి తంకు అన్నబయినె, అప్పబొయినీనెగా డక్కితందుకు యేసు లజ్జొపొడిలాని.

12 †సడకు సెయ్యె పురువుదీకిరి

తూ కొరిలాంచ గురించి,
 తో నా గురించి మో అన్న బయినుకు ప్రకటించిమి.
 ఈనె సమాజం మొజిరె తో గిత్తో గైకిరి స్తుతించుంచి బులిసి.

13 ‡ఈనె “మియ్యి తాకు నమ్మిగీకిరి అచ్చి” బులి ఇత్తో “మియ్యెను పురువు మెత్తె దిల్ల పిల్లానెను బులి కొయిలీసి.”

14 ఈనె సే పిల్లానె మనమరొ దేకు పిందిగిల్లా యేసురొ రొగొతో మొసా గలిగిలాలింకె యీలందరె సే ప్రకారమాకా మొర్నొరొ అదికారం కలిగిలా అవవాదిరో సక్తికు మొర్నొదీకిరి నాసనం కొరిసి.

15 ఈనె యాకిరి జీవిత కలో అల్లా మొర్నొడొరొదీకిరి దాస్యముకు లోబడిలాలింకు చొడిపించిసి.

16 కీసెయ్యె దేవదూతానె సాయం కొరితందుకునీ. ఈనె యెడకు బదులుగా అబ్రాహామురో సంతానముకు సాయం కొరితందుకాక అయినీ బులి స్పష్టమైలీసి.

17 ఈనె మనమానె పాపం కృమాపన కలిగితె పురువురో దయగల నమ్మకమైలా ప్రదానయాజకుడుగా రొయికిరి సొబ్బి వినయాలై సెయ్యె తా అన్నబయినె అప్పబొయిననుకు పాలివాడుగాయాసి.

18 సెయ్యె సోదింపబొడికిరి ప్రమపొడిసి గనుక, సోదింపబొడిలాలింకు సహాయము కొరితె అచ్చి.

3

యేసు మోసే కన్నా గొప్పిట

1 పురువునంగరె డక్కబొడిలా మో తోటి విస్వాసులైలా అన్నబయినె అప్పబొయినీనె! అమె పొందిగిల్లా విస్వాసము వల్లరె అం ప్రదానయాజకుడుగా పురువు ద్వారా పొడదిల్లా యేసంపరె మనుసు దీగునొండి.

2 పురువురో గొరె మోసే నమ్మకముగా రొల్లపనాక యెయ్యెకూడ సెయ్యె నియమించిలా సొబ్బిపైటిరె నమ్మకముగా అచ్చి.

3 యెయ్యె మోసేకంటె బడే మహిమకు అర్హుడుగా యేసుకు బచ్చిగిచ్చి. గొరొకన్నా సడ బందిలాట బడే గనత పొందుసి.

4 ఈనె ప్రతీగొరొకు కేసోజొనెదీకిరి బదింపించునె. యెడసొబ్బి బందిలాట పురువు జొన్నాక.

5 పురువు అగురుకు కొయితల్లా సంగతీనెకు సాక్యార్థముగా మోసే పరిచారకుడైకిరి పురువు గొరొబిత్తరల్లా నమ్మకముగా అచ్చి.

6 ఈనె క్రీస్తు పో యాకిరి తా గొరొ వుంపరె నమ్మకముగా అచ్చి. ధైర్యము, నిరీక్సన వలరె ఉత్సాహముకు చివరదాకా స్థిరముగా రొన్నే అమ్మాక తా గొరొ యాకిరచ్చొ.

పురువురో ప్రజానెకు విస్త్రాంతి

- 7 ఈనె నడకు పరిసుద్దాత్మ యాకిరి కొయిలీసి.
ఉంచినె తొమె పురువురొ స్వరము సునిలపనైనే
- 8 ఈనె బొనొరె సోదన దినొరె
తొ పితరులు పురువుకు విరోదంగా రగ్గొ పుట్టించిలాపనికిరి
తొ మనుసునుకు కటినము కొరిగితైనాండి.
- 9 నలపై బొచ్చొరొనె మో కార్యమునెకు దిక్కిరి,
తొ పితరునె మెత్తె పరీక్షించికిరి సోదించినె.
- 10 ఈనె మియ్యి సే తరములింకె వల్లరె విసిగిజేంచి
తొమె కెబ్బుకు తొ హుదయ ఆలోచనరె తప్పిజిల్లీసా.
మో బట్టోసుకు తెలిసిగిన్నార్లీసా.
- 11 గనక మియ్యి రగ్గొసంగరె తంకు ప్రమానము కొల్లాపనికిరి
తంకె మో విస్త్రాంతిరె ప్రవేశించినింతె బులి కొయిలించి.
- 12 అన్నబయినే జీవముగల్లా పురువు నడికిరిబాజిల్లాపనికిరి
విస్వాసమునీల దుష్టహుదయము తొబిత్తరె కేసెయినెను గుటెబెల్లె
అచ్చికివొబులి బులి జాగ్రత్తగా దిగ్గునోండి.
- 13 యెడకు బదులుగా పాపము వల్లరె కలిగిలా బ్రమదీకిరి తొబిత్తరె
కేసినను కటినపర్చిగీకిరి నారొల్లపనికిరి ఆజి బుల్లా సమయము
తల్లాబెల్లాక ప్రతిదినె జొనుకు జొనె బుద్ధికొయిగిండి.
- 14 క్షేంకిబుల్లీ అగరెదీకిరి అముకు తల్లా ద్రుడ విస్వాసము
అంతముదాకా గట్టిగా దరిగిన్నే క్రీస్తురె బాగస్తులైకిరి రోంచొ.
- 15 * ఆజి తొమె తా స్వరం సునిలాపనైనే
తొ పితరులు పనికిరి పురువుకు విరోదంగా బుల్లకిరి,
తొ హుదయములుకు కటినపర్చిగిన్నాసి
బులి లేకనాలై రాసికిరి అచ్చి.
- 16 † పురువురొ గొల సునికిరి తాకు విరోదంగా రగ్గొ పుట్టించిలా యే
ప్రజానె కేసే? అంకల్లా మోసే ద్వారా ఐగుప్తు దీకిరి బయలుదేరికిరి
అయిలాలింకాక నీనా?

* 3:15 కీర్తన 95, 7, 8 † 3:16 సంత్యా 14, 1-35

17 కా అంపరె నలపై బొచ్చొరోనె సెయ్యె రగో పొడిసి? పాపము కొల్లాంకంపరాక నీనా? తంకల్లా మొడానెగా బొనొరె జొడిజీసె.

18 తా విస్త్రాంతిరె ప్రవేసించినింతెబులి కా గురించి ప్రమానము కొరిసి? అవిదేయులైలలింకె గురించాకనీనా.

19 ఈనె అవిస్వాసము సంగరె తంకె జెన్నారిసెబులి గ్రహించిలింబొ.

4

1 తా విస్త్రాంతిరె ప్రవేసించిమంచి బుల్లా వాగ్దానము ఇంకా టారికిరిల్లా తొబిత్రె కేసైనెను గుటెబెల్లె సే వాగ్దానము నాకడిగీకుంటా తప్పిజిమ్మొకివో బులి డొరొ కలిగికిరి తమ్మంచి.

2 తంకె ప్రకటించిలాపనికిరి అముకంకా సువార్త ప్రకటించబొడిసి. ఈనె తంకె సునిలలింకెదీకిరి విస్వాసము కలిక్కిరి మిసికిరినింతే గనుక సునిలా వాక్యము తంకు వ్యర్థమైజేసి.

3 ఈనె స్రుస్తి ఆరంబం తీకిరి తా సొబ్బిపైటినె సంపూర్తి కొరికిరి అచ్చి. యే విస్త్రాంతి గురించి గనక మియ్యి రగోసంగరె

తంకు ప్రమానము కొల్లాపనికిరి తంకె మీ విస్త్రాంతి దూంచిబుల్లా దెసారె తంకె ప్రవేసించినింతె బులి కొయిలించి.

సెయ్యె కొయిలా కొతా సునికిరి విస్వాసులైలా అమె సే విస్త్రాంతిరె ప్రవేసించిలింబొ.

4 ఈనె “పురువు సత్తరొ దినోరె తా కార్యముసొబ్బి ముగించికిరి విస్త్రమించిసి” బులి సత్తరె దినోగురించి సెయ్యె గుటె పక్కరె కొయికిరి అచ్చి.

5 యెడానీకిరి యేచోటురాక తంకె మోవిస్త్రాంతిరె ప్రవేసించినింతె బులి కొయికిరి అచ్చి.

6 ఈనెను కేసో కుండె మంది విస్త్రాంతిరె ప్రవేసించుసెబుల్లా కొతా నిచ్చయము గనక అగరె సువార్త సునిలాలింకె విస్వసించిలానింతె గనక ప్రవేసించిలానింతె.

7* “అజి తొమె పురువురొ కొతా సునిలాపనైసే

* 4:7 కీర్తన 95, 7, 8

తొ మనుసూనెకు కటిసపర్చిగిత్తెనాండి”
 బులి బడే పొచ్చాడె కొయిలా ప్రకారము ఎత్తెకలో
 అయిలా తరువాత దావీదు గ్రందమురె
 ఆజి బుల్లా గుటె దినొరె నిర్నయించిసి.

8 † యెహోసువ తంకు విస్త్రాంతి కలిగించినె సే తరువాతరె పురువు
 వాగ్దానం కొరిలా ఇంగుటె దినొగురించి సెయ్యె నాకొయికుంటా రొయిత.

9 గనక పురువు సత్తరొ దినొరె విస్త్రాంతి కడిగిల్లాపనాక పురువురొ
 మనమానుకంకా విస్త్రాంతి అచ్చి.

10 ‡ కైంకిబుల్నే పురువు తా పైటినుకు ముగించికిరి విస్త్రమించిలా
 ప్రకారము తా విస్త్రాంతిరె ప్రవేసించిలాట కూడ తా పైటినుకు
 ముగించికిరి విస్త్రమించుసి.

11 గనక అవిదేయత వల్లరె తంకె పొడిజెల్లపనికిరి అంబిత్తరె
 కేసైనను నాపొడిజికుంటా సే విస్త్రాంతిరె ప్రవేసించితందుకు ప్రయత్నం
 కొరిమండి.

12 కైంకిబుల్నే పురువురొ వాక్యము సజివమైలా
 బలముగలిగిలాటైకిరి దీటఅంచుగలిగిలా కత్తిపనాట కెటువంటి
 కడ్లముకన్నా వాడిగా రొయికిరి పొర్నొఆత్మానెకు కీల్లుకు మూలుగునెకు
 యిడకడుకుంటా దూరికిరి హ్రుదయమురొ తలంపూనెకు
 ఆలోచనానెకు పరిక్సించిలీసి.

13 ఈనె పురువురొ ద్రుస్తిరె నాదిగిదిల్లాట కిచ్చిసి. అమ్మె సొబ్బీ
 దిగితల్లా పురువుకాక లెక్క కొయిమాసి. సే పురువురొ అంకినెకు యే
 స్రుస్తిరె రొల్లా సొబ్బి మరుగునీకిరి తేటగా అచ్చి.

యేసాక గొప్ప ప్రదాన యాజకుడు

14 పురువురొ సముకముద్వారా జెల్లా పురువురొ పో యిలా యేసు
 బుల్లా గొప్ప ప్రదానయాజకుడు అముకు అచ్చి గనక అమె పొందిగిల్లా
 విస్త్రాసముకు గట్టిగా దరిగిమ్మా.

† 4:8 ద్వితి 31, 7 యెహోసువా 22, 4 ‡ 4:10 ఆదికాండము 2, 2

15 అం ప్రదానయాజకుడు అం బలహీనతానె దీకిరి, అం దీకిరి సమాన అనుబవం కలిగిలాట. సొబ్బివినయాలై అంపనాక సోదింపబొడినన్నా సెయ్యె పాపం నీలాటైకిరి అచ్చి.

16 గనక అమె కనికరం పొందికిరి సమయానుకూలమైల సహాయము కోసం క్రుప పొందితె ధైర్యము సంగరె క్రుపా సింహాసనం పక్కరకు జెమ్మా.

5

1 ప్రతి ప్రదానయాజకుడు మనమానెతీకిరి ఏర్పాటు కొరిగీకిరి పాపోనె కోసం అర్చనానెకు బలీనెకు అర్పించితె పురువు వినయమైలా కార్యములు జరిగించితె మనమానె గురించి నియమించబొడిసి.

2 సెయ్యెంకా బహీనతసంగరె ఆవరింపబొడికిరి తల్లందరె సెయ్యె కిచ్చి నాఅరక్షైలాలింకంపరె బట్టోతప్పిలాలింకంపరె ఓర్పుకలిగిలాటైకిరి అచ్చి.

3 *సీ కారనం వల్లరె మనమానె పాపోనె కోసం క్యాకిరో సాకిరాక తా కోసంకూడా కోసం అర్చనము కొరివలిసిలాటైకిరి అచ్చి.

4 †ఈనె కేసైనన్నా యే గనత తాకు సెయ్యాక పొందిగిన్ని గని అహారోనుకు డక్కిపించిలాపనికిరాక పురువుదీకిరి డక్కిపించిగీకిరి ప్రదానయాజకుడుగా యే గనత పొందుసి.

5 ‡సాకిరాక క్రీస్తుకూడ ప్రదానయాజకుడైతందుకు తాకు సెయ్యాక గౌరవించబొడిలాని గని, తువ్వ మో పో బులి

మియ్యి ఉంచినె తొత్తై జొర్నొకొరించి బులి తాదీకిరి కొయిలాపనాక తాకు పురువు హెచ్చించిసి.

6 §సీ ప్రకారమాక

తువ్వ మెల్కీసెదెకురో క్రమము చొప్పురె నిరంతరము తల్లా యాజకుడుగా అచ్చు బులి ఇంగుట పక్కరె కొయిలీసి.

* 5:3 లేవి 9, 7 † 5:4 నిర్గమ 28, 1 ‡ 5:5 కీర్తన 2, 7 § 5:6 కీర్తన 110, 4

7 *యేసు బూమంపరె రొల్లా దినోనై గొప్ప కందసంగరె అంకిరె పని కడిగీకిరి, తాకు మొర్నొ తీకిరి రక్సించిలాటకు ప్రార్థన కొరిసి. యాచనలకు సమర్పించికిరి తగ్గింపు జీక కలిగికిరి రొల్లాబల్లె సెయ్యె అంగీకరించబోడిసి.

8 సెయ్యె పో గా రొయికిరి సెయ్యె పొడిలాస్తమవల్లరె విదేయతకు సుగ్గిచ్చి.

9 ఈనె సెయ్యె సొబ్బి వినయాలై సంపూర్నసిద్ధి పొందిలాటైకిరి తాకు విదేయులైలాలింకు నిత్యమైలా రక్సనకు దీతందుకు కారకుడైకిరి అచ్చి.

10 ఈనె తాకు పురువు యాజకుడైలా మెల్కీసెదెకురొ క్రమము చొప్పురె ప్రదానయాజకుడుగా పురువు నిర్ణయించిసి.

విస్వాసం తీకిరి బాజిల్లాలింకు హెచ్చరించువురో

11 యెడగురించి అమె కొయివలిసిలాంచ బడే సంగతీనె అచ్చెగాని తొమె సునితె బద్ధకస్తులైలందరె వివరించువురో కొన్టా.

12 కలొసంగరె దిగినె తొమె బోదకునెగా తమ్మాసి గని పురువురో కొతానె వినయంరె అగరొ మూలపటోనెకు తొముకు ఇంకా జొనె కొయివురైలిసి. తొమె దుద్దొపిలాలింకెపనాక అచ్చొ గాని బలమైలా కద్ది కైలాలింకె పనికిరినింతొ.

13 ఈనె దుద్దొపీలా సొబ్బిలింకె పిల్లానాక గనక నీతి వాక్యవినయమురె తప్పు ఒప్పునె గురించి అనుబవజ్ఞానం నీలాటపనికిరి అచ్చి.

14 పరిపూర్నులు అయిలాలింకె తంకె అనుబవం సంగరె మేలు కీడులుకు ఆలోసించిలా జ్ఞానం కలిగికిరి తాసె. తంకాక బలమైలా కద్ది కావాలి.

6

1 కాబట్టి క్రీస్తు బోదరొ మూలపటోనె గురించి పదేపదే చర్చించువురో మానిగీకిరి పరిపూర్నత పొందితే అగురుకు పరిపూర్నత

* 5:7 మత్త 26, 36-46; మార్కు 14, 32-42; లూకా 22, 39-46

పొందితందుకు కొనసాగించిమా. గోరమైలా పైటినె సడికిరి, మారుమనస్సు పొందివురో, పురువురె విస్వాసము.

² బాప్టిసం గురించి బోద, ముండొంపరె అత్తోనెపొగిలాట గురించి మొర్లిలింకె పునరుత్థానముకు నిత్యమైలాతీర్పు బుల్లా యే పునాదీనె ఇంక ఇంకా నాపొక్కుంటా రొమ్మండి.

³ పురువు అనుమతిదిన్నే అమె అగురుకు సాకిరి కొరిమండి.

⁴ విస్వాసంరె తొలిగిజిల్లా జొనె ఇంకా పచ్చాత్తాపం బిత్తురుకు క్యాకిరి అయిపారి? గుటె సారి ఎలిగించబొడికిరి, పరలోకసంబందమైలా వరముకు చక్కిదిక్కిరి పరిసుద్ధాత్మరె పాలుపొందికిరి.

⁵ పురువురొ వాక్యముకు అయితల్లా కలొరొ సక్తుల గురించి అనుబవపూర్వకంగా తెలిసిగిల్లాలింకె.

⁶ ఈనె తంకవినయమురె పురువురొ పొకు ఇంకా సిలువపొగితె సొబ్బిలింకగరె తాకు అవమానము కొరిలీసె గనుక సాలింకు ఇంకా మారుమనుసు పొందిలాపనికిరి కొరువురొ అసాద్యము.

⁷ క్షైంకిబుల్నే నేల సడంపరె అత్తమానూ పొడిలా పనిపీకిరి కేసె బిల్లోకొరిలీసొ తంకు అనుకూలమైలా వచ్చకు పచ్చిపించికిరి పురువు ఆసీర్వాదం దూసి.

⁸ ఈనె కొంటానె తుప్పానె గచ్చ తీగానెకు సడుంపరె బొడదిల్లాబెల్లె సడ నాపైటికైలాట బులి విసర్జించిలాటబులి సాపము పొందిలాట బులి ఆకరుకు నియ్య దీకిరి పుడ్డుపూసె.

⁹ గనక ప్రియమైలాలింకే, అమె యాకిరి కొయినన్నా తొమె అడకన్నా బొట్టెలా రక్సనకరమైలా స్థితిరాక అచ్చొబులి గట్టిగా నమ్మిలించొ.

¹⁰ తొమె కొర్లా కార్యముకు తొమె విస్వాసునెకు పరిచర్య కొరికిరి ఇంక పరిచర్య కొరువురొ వల్లరె తా నా దీకిరి దిగిదిల్లా ప్రేమకు పసిరిజితె పురువు అన్యాయస్తుడునీ.

¹¹ అమె కేట గురించి ఎదురు దిగిలించొ సడ పొందితె ఆసక్తి దిగిపించిలాలింకెపనికిరి ఆకరి వరకూ రొమ్మాసి బులి మో గొప్పు ఆన.

12 తొమె బద్ధకస్తులైకిరి నీకుంటా విస్వాసం దీకిరి, ఓర్పుదీకిరి పురువు దిల్లా వాగ్దానముకు పొందిగిమ్మాసి బులి అం ఆస.

నమ్మకమెలా పురువురొ వాగ్దానం

13 పురువు అబ్రాహాముకు వాగ్దానము కొరిలాబెల్లె తాకన్నా గొప్పిటనీ గనక స్వయంగా తా తోడు బులికిరాక యే ప్రమానము కొరిసి.

14 కచ్చితముగా మియ్యి తొత్తె ఆసీర్వదించుంచి బులి సొత్తాక తొత్తె బడేజనముగా విస్తరించుంచి బులి కొయిసి.

15 సే కొతా నమ్మిలా అబ్రాహాము ఓర్పుదీకిరి ఎదురు దిగిసి. గనక పురువురొ వాగ్దానపలము పొందిగిచ్చి.

16 మానమానె తంకన్నా గొప్పిట తోడు బులి ప్రమానము కొరుసె. తంకె ప్రతీ వివాదముకు ప్రమానం దీకిరాక పరిస్కారము జరిగివో.

17 పురువు తా వాగ్దాన వినయమురె తా ఉద్దేశముకు నామార్చిగిల్లాటైకిరి, వాగ్దానముకు పొందిగిత్తె వారసులైలాలింకు సడ స్పృష్టము కొరిగిచ్చి. సడవల్లె వాగ్దానముకు తా ఉంపరె ప్రమానం కొరికిరి ద్రడపర్చిగిచ్చి.

18 సడకు మార్పునీలా యే దీట వినయాలై పురువు సారొకొతాకొయిని. సెయ్యె దిల్లాంచ కోసం ఎదురు దిగిలాలింకు గొప్ప ప్రొత్సాహం కలిగిలాపనికిరి యాకిరి కొరిసి.

19 యే నిరీక్సన అం జీకానెకు నాపిట్టిగిబాజీకుంటా స్థిరముగా రొయిదీతె లంగరు పనికిరి. సడ కచ్చితముగా స్థిరముగా, తెరబిత్తరెకు ప్రవేశించిలాపనికిరి కొరిలీసి.

20 కెబ్బుకు మెల్కిసెదెకు క్రమము చొప్పురె ప్రదానయాజకుడైలా యేసు తాండ్రబిత్తరె అంకన్నా అగరె అమె పళ్ళముగా ప్రవేశించిసి.

7

యాజకుడైలా మెల్కిసెదెకు

1* అబ్రాహాము యుద్ధంరె చార్లింకు రొజానుకు ఓడించికిరి బుల్లికిరి అయితల్లాబెల్లె సాలేముకు రొజా ఇంకా గొప్ప పురువురొ యాజకుడైలా మెల్కిసెదెకు అబ్రాహాముకు మిసిగీకిరి తాకు ఆసీర్వదించిసి.

2 సెల్లె అబ్రాహాము సొబ్బిఆండ్రె దొస్టావొతు తాకు దీసి. సెయ్యె సాలేము రొజాయిలందరె తా నా కు అగరె నీతికి రొజాబులికిరి తరువాత తా నాకు సమాదానపు రొజాబులి అర్థం.

3 మెల్కిసెదెకు బో గురించైనన్నా మా గురించైనన్నా వంసావలి కోసమైనా జొర్నొ మొర్నొ గురించన్నా ఆదారానె నీలాట్టెకిరి, జీలాకలోల్లా నిత్యము యాజకుడైలా పురువురొ పో కు పోలికిరి అచ్చి.

4 దిగోండి యెయ్యె కెత్తో గొప్పిటో. మూల పురుసుడైలా అబ్రాహాము యుద్ధమురె సెయ్యె పొందిగిల్లా సొబ్బివస్తువూనెరల్లా దొస్టావొతు దీసి.

5 ఈనె లేవిరొ పొనె యాజకత్వము పైటి పొందిలాళికె తంకన్నబయినె అబ్రాహాము వంసమురె జొర్నొనన్నా, దర్మసాస్త్రము చొప్పురె తా సొంత మనమానైలా ఇస్రాయేలు ప్రజానె పక్కరె దొస్టావొతుకు కడిగిత్తందుకు ఆజ్ఞకు పొందికిరి అచ్చె.

6 గాని మెల్కిసెదెకు లేవీ వంసముకు నాచెందినన్నా, పురువురొ వాగ్దానాలు పొందిగిల్లా అబ్రాహాము పక్కరె దొస్టావొతు కడిగీకిరి తాకు ఆసీర్వదించిసి.

7 ఆసీర్వాదం పొందిలాటకన్నా ఆసీర్వాదం దిల్లాట గొప్పిటబులి కొయితె సందేహం నియ్యి.

8 ఈనె లేవి క్రమముకు దిగినె మొర్నొకు గురైలాళికె దొస్టావొతు కడిగిల్లీసె. గాని మెల్కిసెదెకు క్రమము చొప్పురె దిగినె కెబ్బుకూ జీవించిలాట కడిగిచ్చి బులి లేకనము కొయిలీసి.

9 ఈనెమాను గుట విదముగా కొయిమాసిబుల్నే అబ్రాహాము దొస్టావొతు దిల్లాపనికిరైనే దొస్టావొతు కడిగిత్తల్లా లేవియులుకూడా దొస్టావొతు పురువుకు దిల్లాపనికిరాక.

* 7:1 ఆదికాండము 14, 17-20

10 క్యాకిరిబుల్నే అమె సడ గురించి కొతాలగినె మెల్కీసెదెకు అబ్రాహాముకు మిసిగిల్లాబెల్లె లేవీ ఇంకా జొర్నెలాని గాని తా పితరులురో దేరాక అచ్చి.

11 సె లేవీయులు యాజకూనెగా సంపూర్ణముగా కొర్నే అహారోనుకు బదులుగా, మెల్కీసెదెకు యాజకుడు క్రమమురె ఇంకాజొనె యాజకుడు అయివలిసిలా అవసరం రొయితానీ.

12 ఎడానీకిరి యాజకూనె మార్చబొడినే యాజకదర్శము కూడా మార్చబొడుసి.

13 కా గురించి యే సంగతీనె కొయిసెవో సే అం ప్రబువు వేరె వంసమురె జొర్నెసి. సే వంసమురోట కేసైనను కెబ్బే బలిపీటము పక్కరె పరిచర్య కొరిలానింతె.

14 అం ప్రబువు యూదా సంతానమురె జొర్నెసి బుల్లాట స్పష్టమాక .సె గోత్రవినయమురె యాజకూనె గురించి మోసే కిచ్చికొయిలాని.

మెల్కీసెదెకు పోలికిరి రొల్లా వేరె పూజరి

15 మెల్కీసెదెకు పోలికిరి రొల్లా వేరె యాజకుడు అయికిరి అచ్చి బులి అమె కొయిలా సంగతీనె బడే స్పష్టముగా అచ్చె.

16 సెయ్యె మనమానొ ఆజ్ఞానెకు నియమాలు వల్లరె యాజకుడుగా నియమించబొడిలాని గాని నిత్యము జీకిరిరొల్లా సక్తిదీకిరి యాజకుడుగా నియమించబొడిసి.

17 క్యాకిరిబుల్నే తువ్వ నిరంతరము మెల్కీసెదెకు క్రమము చొప్పురె యాజకుడైకిరి అచ్చుబులి తా వినయంరె లేకనానె కొయిలీసె.

18 సె దర్మసాస్త్రము కేటకు సంపూర్ణసిద్ధి కలిగించిలాని గని అగరెదిల్లా ఆజ్ఞ బలహీనమైలాటైలందరె ప్రయోజనంనీలందరె సడకు నివారనకొరికిరచ్చి.

19 కైంకిబుల్నే మోసేకు దిల్లా దర్మసాస్త్రం కేటకు పరిపూర్తి కొరిలాని. ఈనె అముకు గొప్ప నిరీక్సన దీసి సడ ద్వారా అమె పురువు పక్కు చేరిగిల్లించొ.

20 యెడ వినయంరె పురువు ప్రమానము కొరిసి. ఈనె పొదర్లకె యాజకూనెగా రొయితె కేసే ప్రమానం కొరిలానింతె.

21 ఈనె

యేసు ప్రమానము ద్వారా యాజకుడు యీసి.

ఆ వినయమురె పురువు తాసంగరె తా కొతా నామార్చిగీకుంటా
కెబ్బకూ యాజకుడుగా తాసు బులి ప్రబువు

ప్రమానం కొరిసి బులి కొయిసి.

22 యే ప్రమానం ద్వారా యేసు స్రేష్ఠమైలా నోనిబందనకు బాద్యుడైసి.

23 ఈనె బడేలింకె యాజకూనె యీసెగాని మొర్నొ వల్లరె సే
యాజకప్రతికి కొనసాగించినారె.

24 ఈనె యెయ్యె నిరంతరము జీకిరిరొల్లాట గనుక మార్పునీలా
యాజకత్వము కలిగిలాటయీసి.

25 యెయ్యె తా సంగరె పురువు పక్కు అయిలాలింకు పక్నముగా,
విజ్ఞాపనము కొరితందుకు నిరంతరము జీవించిలీసి గనుక తంకు
సంపూర్ణముగా రక్సించితె సమర్థుడైకిరి అచ్చి.

26 యేసు పవిత్రుడు, నిర్దోసి, కల్మసంనీలాట, పాపోనెరె,
నాచేరుకుంటా ప్రత్యేకముగా రొల్లాట మెగొమండలముకన్నా వేరుగా
హెచ్చయిలాటైకిరి యాట ప్రదానయాజకుడు అముకు సారిపొడిలాట.

27 యెయ్యె పొదరె ప్రదానయాజకూనె వల్లరె అగరె తా సొంత
పాపోనె కోసం తర్వాతరె ప్రజానె పాపోనె కోసం దినెదినెకు బలీనెకు
అర్పించితె అవసరంనీకుంటా సొబ్బిలింకుకోసం గుట్టెబెల్లాక తాకు
సెయ్యక బలి అర్పించిగిచ్చి.

28 దర్మసాస్త్రము బలహీనమైలా మనమానుకు
ప్రదానయాజకూనెగా నియమించిసి. గాని దర్మసాస్త్రము తర్వాతరె
అయిలా ప్రమానము తా పొ ద్వారా నియమించబొడికిరి సంపూర్ణము
కొరిసి.

8

యేసాక అం ప్రదాన యాజకుడు

¹ అమె వివరించితల్లా సంగతీనె సారాంసం కెడబుల్నే, అముకు సాటపనా ప్రదానయాజకుడు జోనె అచ్చి. సెయ్యె పరలోకంరెరొల్లా గొప్పిట*సింహాసమునకు బత్తోకైలా అత్తో ఆడుకు ఆసీనుడైకిరి బొసరికిరి అచ్చి.

² సెయ్యె అతిపరిసుద్దస్తలమురె బుల్నే మనమసంగరె నీకిరి ప్రబువాక స్థాపించిలా సొత్తాయిలా గుడారముకు పరిచారకుడు యీకిరి అచ్చి.

³ ప్రతీ ప్రదానయాజకుడు అర్చనలకు ఇంకా బలీనెకు పురువుకు బలిదీతె నియమించబొడిసి. సాకిరాక అం ప్రదానయాజకుడు కిడైనా అర్పించవలీసికిరచ్చి.

⁴ దర్మసాస్త్రం ప్రకారము అర్చనానె అర్పించితె యాజకూనె అచ్చె. గనుక యెయ్యె బూమంపరె రొన్నే కెబ్బుకూ ప్రదానయాజకుడుగా రొయితాని.

⁵ మోసే గుడారము అమర్చిగిల్లాబెల్లె పొరొతో ఉంపరె తొత్తె దిగిదెల్ల మాదిరి చొప్పురె సమస్తముకు కొరితందుకు జాగర్తపొడు బులి పురువుదీకిరి హెచ్చిరింపబొడిల ప్రకారమురె యే యాజకూనె పరలోకసంబందమైలా వస్తువూనెరొ నీడ రూపమైలా గుడారము బితైరె సేవ కొరిలీనె.

⁶ ఈనె యేసు ఉంచినె మరిబూతుయాల వాగ్దానాలురె నియమించిలా మరిబూతుయాల నిబందనకు పురువుకు మనమానెకు మొజిరోవ్యక్తిగా గొప్ప సేవకత్వము పొందికిరి అచ్చి.

⁷ కైంకిబుల్నే సే అగరె నిబందన లోపము నీలాట యీనె దీటోనిబందనకు అవకాసం రొయితని.

⁸ †ఈనె పురువు తా మనమానొ తప్పునె తెలిసిగీకిరి యాకిరి కొయిలీసి
“ప్రబువు ఇదిగొ గుటె కలొ అయిలీసి.

* 8:1 మహామహని † 8:8 యిర్మియా 31, 31-34

సెల్లె ఇస్రాయేలు గొరొలింకెదీకిరి యూదా
గొరొలింకెదీకిరి మియ్యి నో నిబందన కొరుంచి బులి కొయిసి.

9 ఎడ మియ్యి ఐగుప్తు దెసొ దీకిరి
అంకె పితరులుకు దోరకు రప్పించితె
తంకు అత్తో దరిగిల్లా దినో దీకిరి మియ్యి
కొరిలా నిబందనపనాట నీ.
కెడబుల్నే తంకె మో నిబందనరె నమ్మకంగా నింతె
గనుక మియ్యి తంకు వినయంరె
పట్టించిగిల్లానీ బులి కొయిలీసి.

10 సె దినో ఈనె తరువాత ఇస్రాయేలు
గొరొలింకు సంగరె మియ్యి కొరిలా నిబందన కెడబుల్నే
తంకె మనసురె మో దర్మవిదీనె రొయిదీంచి
తంకె హుదయము ఉంపరె నడ రాసుంచి
మియ్యి తంకు పురువొ యాకిరి తాంచి
తంకె మెత్తె జనముగా తానె.

11 తంకె బిత్తెరె కేసెను
'ప్రబువుకు తెలిసిగిన్నెంత' బులి
తా పట్టనంలింకె యానెను తంక అప్ప
బోయినీనె ఈనెను బోదించినీ
ఈనె తంకెబిత్తరె చెన్నిలింకె మొదలుదీకిరి
బొడొలింకె జాంక సొబ్బిలింకె మెత్తె తెలిసిగివ్వె.

12 మియ్యి తంకె తప్పునె క్కమించికిరి
ఇంకా తంకె పాపోనె కెబ్బుకూ గుర్తు కొరిగిన్ని బులి కొయిసి."

13 పురువు నో నిబందన బులి కొయివురొ వల్లరె అగరోట
పుర్వనిబందనగా కొరిసి. కెడబుల్నే కెడపుర్నాటవొ నడ
అంతరించిజితె సిద్ధముగా అచ్చి.

9

బూమంపరె ఇంకా పరలోకంరె ఆరాదన

1 అగరె నిబందనరె ఆరాదనకు నియమానె ఈనె యేలోకో కూడ పరిసుద్దస్తలం నియమాలు దివ్యురొ యీసి.

2 క్షంకిబుల్నే అగరె గుటె గుడారము ఏర్పర్చబొడిసి తాండ్రె బొత్తిస్తంబముకు, బల్లకు, సడ వుంపరె రొయిదిల్లా పురువుకు అర్పించిలా రొట్టిసె అచ్చె. సడకు పరిసుద్దచోటు బులి నా.

3 దీటొ తెరకు తెనిపొక్కరె అతిపరిసుద్దమైలా చోటురె గుడారము తాసి. సడ బడె అతిపరిసుద్దస్తలం.

4 తాండ్రె సాంబ్రానీ దూపంపొగిలా సున్న పెడి అచ్చి. సాబ్బియాడుకూ సున్నరేకులుదీకిరి రొల్లా నిబందన మందసము అచ్చి. సే మందసమురె మన్నా సంగరె తల్లా సున్నరొ గిన్నె, చిగిరించిలా అహరోను అత్తోబడ్డి, రాసికిరి రొల్లా దీట నిబందన పలకలు అచ్చె.

5 సడంపరె కరునాపీటముకు ఉంపరె మహిమ సంగరె రెక్కానె పిటిగీకిరి రొల్లా కెరూబులు అచ్చె. ఈనె ఉంచినె వివరముగా కొయివురొ యీనీ.

6 యెడ యాకిరి ఏర్పాటు కొరిలాబెల్లె యాజకూనె సేవకొరికుంటా, నిత్యము అగరె గుడారము బిత్తురుకు జోసె.

7 * గాని బొచ్చురె గుటెబెల్లె మాత్రమాక ప్రదానయాజకుడు జొన్నె తా కోసం తా మనమానె కోసం నాతెలిసికుంటా కొరిలా పాపోనె కోసం పురువుకు అర్పించిలా రొగొతో దరిగీకిరి దీటొవ గుడారమురె ప్రవేశించివొ.

8 ఎడవల్లరె సే అగరె గుడారము ఇంకా నియమించిలాబెల్లె అతిపరిసుద్దచోటురె ప్రవేశించిలా బట్టరె డొరొపొడిలానీ బులి పరిసుద్దాత్మ తెలియపర్చిలీసి.

9 సె గుడారము వుంచినె కలోకు ఉదాహరణగా అచ్చి. యే ఉదాహరణరొ అర్థం కిడబుల్నే మనస్సాక్కి వినయమురె ఆరాదికుడైలాటకు సంపూర్ణత నాకలిగించినార్లా అర్పనానెకు, జంతుబలీనెకు అర్పించినె.

* 9:7 లేవీయకాండము 16, 2-34

10 ఎడ నో క్రమము జరిగిలా కలొ అయిలాజాంక నియమించిబొడిసి. కైకుంట, పీకుంటా బడే విదములయిలా సుద్దీకరన పద్దతినె సొబ్బి దేరొ ఆచారమూనె మాత్రమాక.

11 ఈనె క్రీస్తు అయితల్లా మేలులువిసయమురె ప్రదానయాజకుడుగా అయికిరి, సెయ్యె నిత్యమైలా విమోచన సంపాదించికిరి అత్తోనెదీకిరి నాకొర్లాట నీకిరి, యే స్రుస్తికి నాసంబందించిలాట, మరి గనమైలా పరిపూర్ణమైలా గుడారము సంగరె సేవకొర్లీసి.

12 మేకలురొ గయినెరొ రొగొతోసంగరె నీకిరి సొబ్బిలింకరొ నిత్యమైలా రక్సన కోసం తా సొంత రొగొతోదీకిరి గుట్టెబెల్లాక అతిపరిసుద్దచోటుకు ప్రవేశించిసి.

13 కైంకిబుల్నే మేకలరొ, ఎడ్దులరొ రొగొతోకు మలినమైలాలింకంపరె గయిదూడరొ పోసొ జల్లువురొ వలరె దే బయలై పవిత్రం కలిగిలీసి.

14 నిత్యుడైలా ఆత్మ సంగరె తాకు సెయ్యె పురువుకు నిర్దోసివనికిరి అర్పించిగిల్లా క్రీస్తురొ రొగొతో నిర్దీవమైలా ఆచారమూనె సడికిరి అమె జీవముగలిగిలా పురువుకు సేవించితె తో మనస్సాక్సికి కెత్తో బడే సుద్దీకరిసి.

15 యే కారనం వలరె అగరె నిబందన కలొరె జరిగిలా అపరాధము దీకిరి విడుదల కలిగితె సెయ్యె మొర్నొ పొందితండుకు పురువుసంగరె డక్కబొడిలాలింకెపనికిరి నిత్యమైలా వారసత్వం గురించి వాగ్దానము పొందితె నిమిత్తము సెయ్యె నో నిబందనకు మొజిరొ మనమగా అచ్చి.

16 మొర్నొసాసనం కేటె అచ్చొ సెట్టె మొర్నొ సాసనం రాసిలాలింకెరొ మొర్నొ అవసరము.

17 సె నియమం రాసిలాలింకె మొర్నొ పొందినాక సడ చెల్లుసి. సడ రాసిలాలింకె నామొర్జిన్నే సడ కెబ్బుకైనన్నా చెల్లుసి.

18 ఈనె యే కారనం వలరె అగరె నిబందనకూడ రొగొతో నాఉపయోగించిలాపనైనే చెల్లుబాటు యిలానీ.

19 దర్మసాస్త్రం ప్రకారమురె మోసే ప్రతి అజ్ఞకు మనమానె సంగరె కొయిలా తరువాత సెయ్యె పనిదీకిరి, రొగొతోరంగు గల్లా, గొర్రెబల్లోనెదీకిరి, హిస్సోపు దీకిరి, గయ్యానొ, మేకలురొ రొగొతోనె కడిగీకిరి మనమానంపరె దర్మసాస్త్రం ఉంపరె జల్లెసి.

20 “సే తరువాత మోసే తంకసంగరె పురువు యే నిబందన రొగొతో తొముకు దిల్లీసి యెడకు నిబందన గుర్తుగా ఆచరించు బులి కొయిసి.”

21 సాకిరాక గుడారము ఉంపరె సేవ పాత్రానె సొబ్బిటంపరె సే రొగొతో జల్లెసి.

22 ఈనె దర్మసాస్త్రప్రకారమురె సొబ్బి వస్తువూనెకు రొగొతోదీకిరి సుద్ది కొరిమంచిబులి, రొగొతో నాచిందించికుంటా పాపక్ష్మాపన కలిగిసి బులి కొయిపారొ.

క్రీస్తురొ బలియాగం దీకిరి పాపొనెకు కడిపీవురొ

23 పరలోకంరె రొల్లించకు పోలికిరి రొల్లా వస్తువూనె యాంచ బలినె వలరె సుద్దికొరువురొ అచ్చి బులి ఈనె పరలోక సంబందమైలా యెడకంటే స్త్రీస్తమైలా బలినె వలరె సుద్దికొరుమాసి.

24 సడ వల్లరె సొత్తయిలా పరిసుద్దచోటురె పోలికిరి మనమానె అత్తొనె సంగరె కొరిలా పరిసుద్దచోటురె క్రీస్తు ప్రవేసించలానీ గాని, ఉంచినె అం కోసం పురువుకు సన్నిదిరె దిగిదీతందుకు పరలోకమురె ప్రవేసించిసి.

25 సెత్తాక నీ, ప్రదానయాజకుడు ప్రతీ బొచ్చురొ గయ్యానొ రొగొతో కడిగీకిరి అతిపరిసుద్దచోటురె ప్రవేసించిసి, ఈనె క్రీస్తు సాకిరి బడేసార్లు తాకు సెయ్యె అర్పించిగిత్తె ప్రవేసించిలానీ.

26 సాకిరి ఈనెమాను జగత్తుపునాది మొదలు దీకిరి సెయ్యె బడే సారులు స్రమపొడివురొ యాసి. ఈనె సెయ్యె యుగములు సమాప్తిరె తాకు సెయ్యె బలిగా అర్పించిగిత్తందుకు పాపం కడిగిత్తె గుటెసారి ప్రత్యక్షపర్చబొడిసి.

27 మనమానల్లా గుటె సారి మొర్పొపొందిమంచి బులి నియమించబొడిసి. సే తరువాత పురువు సంగరె తీర్పు తీర్చబొడుసి.

28 దీబోసారంకా క్రీస్తుకూడ బడే పాపొనె బరించితె గుటసారి అర్పించిబోడికిరి తా కోసం కనిపెట్టికిరి రొల్లాలింకు రక్సన నిమిత్తము పాపము నీకుంటా ప్రత్యక్షమైసి.

10

1 దర్మసాస్త్రము అయితల్లా మేలులురొ నీడగలిగిలాటాక గాని సే వస్తువానెరొ సొత్తయిలా స్వరూపముగలిగిలాట నీ. ఈనె సే యాజకూనె ప్రతిబొచ్చొరొ అర్పించిలా గుటవిదమైలా బలీనె సడానుకు దన్నైలాలింకు కెబ్బుకు పరిపూర్నం కొరినారిసె.

2 సాకిరి కొరిలాలింకు సేవించిలాలింకె గుట సారి సుద్దికొరిలా తరువాతరె తంకమనసాక్కికు పాపం కోసం జ్ఞాపకం రొన్ని ఈనె సడకు అర్పించితె మానిపూసె నీ.

3 ఈనె సే బలీనె అర్పించివురొ వల్లరె పాపొనె జ్ఞాపకము అయిలీసె.

4 కైంకిబుల్నై గయానొ, మేకలురొ, రొగొతో పాపొనెకు కడువురొ అసాద్యము.

5 ఈనె యే కారనం వల్లరె సెయ్యె యే లొకొరె ప్రవేసించిలాబెల్లె యాకిరి కొయిలీసె.

“బలి కు అర్చనకు తువ్వ క్కోరిలాను గని
మెత్తె గుట దేకు సిద్దం కొరిసు.

6 బలిపీటమంపరె గయానుకు పుడ్డువురొ

ఇంకా పాపం కోసం బలీనె అర్పించువురొ తొత్తె ఇస్త్తమైలాటనీ.

7 సెల్లె మియ్యి గ్రందపుచుట్టరె

మోగురించి రాసిలా ప్రకారము

దేవా, తో చిత్తము నెరవేర్చిలాపనికిరి ఇదిగొ మియ్యి అయించి.”

8 దర్మసాస్త్రం ప్రకారం అర్పించితల్లా యెడానల్లా ప్రకారం, బలీనె అర్చనానె బలిపీటమంపరె గయానె పుడ్డువురొ పాపం కోసం బలీనె అర్పించివురొ తువ్వ క్కోరిలాను బులి సడ తొత్తె ఇస్త్తమైలాటనీ బులి అగరె కొయిలాపనాక.

9 తరువాత సెయ్యో తో చిత్తము నెరవేర్చితే ఇదిగో మియ్యి అయికిరి అచ్చి బులి కొయిలీసి. సెయ్యో అగరోటకు మరిపీకిరి దీటోటకు స్తిరపర్చిసి.

10 ఈనె యేసుక్రీస్తు గుట దే రె గుట సారాక సొబ్బిటి కోసం పురువుకు అర్పించిగివురో వలరె అమె అల్లా పాపందీకిరి పవిత్రపర్చబొడించో.

11 ఈనె ప్రతీ యాజకుడు ప్రతీ దినె తా సేవరె, గుట విదమైలా బలీనె బడేసార్లు అర్పించిసి కాని అర్చన ద్వారా పాపొనెకు కెబ్బుకూ కడువురో యీలానీ.

12 యెయ్యో ఈనె పాపొనె కోసం కెబ్బుకూ టారిలా గుట్టాక బలి అర్పించికిరి పురువు బత్తోకైలా అత్తో ఆడుకు బొసికిరి అచ్చి,

13 సెల్లె దీకిరి తా సత్తుమానె తా పాదమునెకు పాదపీటము కొర్లాజాంక కనిపెట్టిలీసి.

14 కైంకిబుల్నే గుట అర్చనవల్లరె యెయ్యో పరిసుద్దపరిచిలాలింకు కెబ్బుకూ సంపూర్నునెగా కొరిసి.

15 యే వినయంరె పరిసుద్ధాత్మకూడ అముకు సాక్సం దిల్లీసి.

16 సెయ్యో అగరె యాకిరి కొయిసి.

ఈనె సె దినోయిలాబెల్లె తరువాత మియ్యి

తంకెదీకిరి కొర్లా నిబందన యెడ

మో దర్శనియమానెకు తంక హ్రుదయమునెరె రొయిదీసె

తంక మనసూనై రాసుంచి బులి కొయిలా తరువాతరె.

17 తంక పాపొనెకు “తంక అక్రమమునెకు ఇంక కెబ్బుకూ జ్ఞాపకము కొరిగిన్నీ బులి” ప్రబువు కొయిలీసి.

18 యెడ కృమాపన కేటె కలుగుసా సెట్టె పాపం కోసం బలీనె అర్పించివురో ఇంక కెబ్బుకూ రొన్నీ.

ప్రోత్సాహం ఇంకా హెచ్చరిక

19 అన్నబయినె, అప్పుబొయినీనె అమె అతిపరిసుద్దచోటురె ప్రవేశించితందుకు యేసు మొర్రొ ద్వారా పరిపూర్ణమైలా స్వాతంత్రం కలిగికిరి అచ్చొ,

20 నోట, ఇంకా జీవంగలిగిలాటైలా, తా దే బుల్లా తెర ద్వారా అముకు బట్టొ పిటిగీకిరచ్చి.

21 పురువురొ గొరొంపరె అముకు గొప్ప యాజకుడు అచ్చి.

22 గనుక మనస్సాక్కిరె కల్మసము నీకుంటా ప్రొక్కింపబడిలా సుద్దప్రదయము గలిగిలాలింకె, నిర్మలమైలాబొల్ల పనిసంగరె గద్దిగిల్లా దే సంగరె గలిగిలాలింకెపని రొకిరి, విస్వాసవిసయమురె సంపూర్ణ నిరీక్సన కలిగికిరి యదార్థమైలా ప్రదయము సంగరె అమె పురువురొ సన్నిదికి జెమ్మా.

23 వాగ్దానము కొర్లాట నమ్మకమైలాట ఈనె అమె నిరీక్సన విసయమైలాట అమె ఒప్పిగిన్నె కచ్చితంగా దరిగిమా.

24 ఇంకా ప్రేమించికుంట, బొల్లపైటీనె కొరితందుకు జొనెకు జొనె ప్రొత్సహించిగిమ్మండి.

25 కుండెలింకె సంగంగా కూడిగిల్లాపనికిరి తొమె కూడ సంగమురె కూడిగిత్తై మానిగితెనాండి ప్రబువు అయిల దినొ సమీపించిలీసి గనుక మరి బూతు జొనుకు జొనె ప్రొత్సహించిగిండి.

26 అమె సత్యము గురించి అనుబవజ్ఞానం పొందిగిల్లా తరువాత బుద్ధిపూర్వకముగా పాపము కొర్నే పాపొనెకు బలి ఇంక రొన్ని.

27 గాని న్యాయపు తీర్పుకు డొరొసంగరె ఎదురుదిగిమంచిబులి విరోదీనెకు నియ్యపనా సిక్స ఇంకా రొసి.

28 కేసెయొనెను మోసే దర్మసాస్త్రముకు నా ఆచరించికుంటా రొన్నే దీలింకె తిల్లింకె సాక్కినెరొ కొతంపరె, నాకనికరించికుంటా తంకు మొర్రొ సిక్స పొగుసె.

29 సాకిరితన్నుగా పురువురొ పొకు గొడ్డోనెతోల్లె మండిపీకిరి, తాకు పవిత్రపర్చిలా నిబందన రొగుతో అపవిత్రం బులి బావించికిరి క్రుపకు

మూలమైలా పురువురో ఆత్మకు దూసించిలాట కెత్తో బూతు సిక్కుకు పాత్రుడో తోమె ఆలోసించుగునోడి.

30 పగతీర్చువురో మోపైటి, మియ్యాక ప్రతివలం దూంచి బులి ప్రబువు కొయిలీసి. ఈనె ప్రబువు తా మనమానుకు తీర్పు తీర్చుంచి బులికిరి కొయిలాట అముకు తెలుసు.

31 జీవముగలిగిలా పురువురో అత్తరె పొడువురో బడే గోరము.

32 ఈనె పురువు తోముకు వెలిగించిలాతర్వాతరె స్రమదీకిరి కూడిల గొప్పు పొరాటము నహించిగిల్లా పూర్వదినోనుకు జ్ఞాపకము దన్నెగిండి.

33 గుటె విదముగా దిగినె, తోమె సొబ్బిలింకెదీకిరి నిందానె, బాదానె అనుబవించువురో వల్లరె, సే సమయంరె స్రమానె అనుబవించిలాలింకెదీకిరి పాలిబాగస్తులైసా.

34 క్యాకిరిబుల్నే తోమె కైదురె స్రమపొడిలాలింకు ఆదరించిసా తోమె ఇంకా స్రేష్టమైలాట స్తిరమైలాటకు వారసత్వం పొందిగిమ్ము బులి జనికిరి, తొ ఆస్తికు వొరిదీగిత్తందుకంకా సంతోసముగా ఒప్పిగిచ్చొ.

35 ఈనె తొ ధైర్యముకు నడదీతెనాండి. నడకు ప్రతివలముగా గొప్పు బహుమానము మిలుసి.

36 తోమె పురువురో చిత్తముకు నెరవేర్చిలాలింకైకిరి తా వాగ్దానముకు పొందితె తోముకు ఓర్పు అవసరమైకిరి అచ్చి.

37 “లేకనానెరె కొయిలాపనికిరి

ఇంక కలో బడే కొంచెమాక అచ్చి. అయితల్లాట

అలస్యం నా కొరికుంటా ఆసి.

38 మోఅగరె నీతిమంతుడైలాట

విస్వాసమూలంగాక జీవించుసి గాని

సెయ్యె పొచ్చుకు బాజిన్నే

తా వల్లరె మెత్తె సంతోసము రొన్నీ.”

39 ఈనె అమె నసించిజీతందుకు పొచ్చుకుబాజిల్లాలింకెనింతో గాని ఆత్మకు రక్సించిగిత్తందుకు విస్వాసము కలిక్కిరి అచ్చి.

11

విస్వాసం

¹ విస్వాసము బుల్లాట నిరీక్ష్ణంపబొడిలాట సత్యస్వరూపముకు, అంకికి నా దిగిదెల్లాట దిగిదిల్లీబులి రుజువైకిరి అచ్చి.

² ఏ విస్వాసం ద్వారా అం పూర్వికులు పురువు దీకిరి మెప్పుపొందిగిచ్చె.

³ లోకొ పురువురో వాక్యము వల్లరె నిర్మానమైనకిరిఅచ్చి. సడబట్టాక అంకికి దిగిదిల్లాటల్లా నాదిగిదిల్లా పదార్థాలుసంగరె నిర్మించబొడిసి బులి విస్వాసముసంగరె గ్రహించిగిలించొ.

⁴ విస్వాసముసంగరె హేబెలు కయాను కన్నా స్తేష్టమైలా బలి పురువుకు అర్పించిసి. పురువు తా అర్చనానె కోసం సాక్షం దిల్లాబెల్లె సెయ్యె తా విస్వాసముసంగరె నీతిమంతుడుబులి సాక్ష్యము పొందిసి. సెయ్యె మొర్జిన్నన్నా తా విస్వాసముగురించి కొతాలగిలీసె.

⁵ విస్వాసముసంగరె హనోకు నామొర్జిల్లా అగరాక పురువు కొనిగీబాజీసి. సెయ్యె కాకు దిగదిల్లానీ క్షేంకి బుల్నే లేకనానె కొయిలాపనాక సెయ్యె నామొర్జిల్లా అగరె పురువుకు ఇష్టంగా రొయితై.

⁶ విస్వాసమునీకుంటా పురువుకు ఇష్టంగా రొప్పురో అసాధ్యము పురువుపక్కు అయిలాలింకె సెయ్యె అచ్చిబులికిరి తాకు కుజ్జలాలింకు పలితం దూసిబులి నమ్మిమంచి.

⁷ విస్వాసముసంగరె నోవహు సడ నా దిగిలా సంగతీసె గురించి పురువుసంగరె హెచ్చురించబొడిలా బెల్లె బయబక్తులు గలిగిలాలింకె తా గొరొలింకు రక్తన కోసం గుటె పడవ సిద్ధం కొరిసి సడసంగరె సెయ్యె లోకొ ఉంపరె నేరం మోపికిరి విస్వాసము సంగరె కలిగిలా నీతికి వారసుడు యాసి.

⁸ పురువు అబ్రాహాము డక్కిలాబెల్లె విస్వాసము సంగరె సె డక్కుకు లోబొడికిరి సెయ్యె స్వాస్థ్యముగా కడిగిల్లా చోటుకు బయలుదేరికిరి జేసి. ఈనె కేటికి జెమ్మంచొ సెడ నా తెలిసిగీకుంటా బయలుదేరికిరి జేసి.

9 విస్వాసము సంగరె సెయ్యె తా సంగరె సే వాగ్దానముకు సమాన వారసుడు యీలా ఇస్సాకు యాకోబు బుల్లాళింకె గుడారమురె రొల్లాబెల్లె పొదరెలింకెరొ దెసారె రొల్లాపనాక వాగ్దాన దెసారె పరదేసులుగా జీవించినె.

10 ఈనె పురువు కిడకు సిల్పిగా నిర్మానకుడైకిరి అచ్చొ సాస్వతమైల పునాదీనె పనికిరి సే పట్నము కోసం అబ్రాహాము ఎదురు దిక్కికుంటా అచ్చి.

11 విస్వాసము సంగరె అబ్రాహాము మొంత్రకలోరె బో యీసి ఇంకా సారా గర్భము అయినెను సక్తి పొందిసి సెయ్యె పురువుకు నమ్మిసి తా వాగ్దానము నెరవేర్చిసి.

12 సెడసంగరె మొర్నొకు పక్కుయినెను సె జొన్నెదీకిరి సంక్యకు మెగొరె నక్సత్రములుపనికిరి, సాంద్రొ బల్లిపనికిరి గొనినాల్లా సంతానము కలిగిసి.

13 అంకె సె వాగ్దానము బుల్లా పలము నా అనుబవించుకుంటా బాజీసె, దూరుతీకిరి దిక్కిరి వందనము కొరికిరి సెయ్యె బూమి అంపరె పరదేసులైకిరి యాత్రికులైకిరి అచ్చెబులి ఒప్పిగీకిరి, విస్వాసము గలిగిలాళింకైకిరి మొరిజేసె.

14 యాకిరి కొయిలాళింకె తంకస్వదేసముకు కుజ్జలించొ బులి తంకె నిరూపించిగిల్లీసె.

15 తంకె కే దెసోదీకిరి అయినెవొ సే దెసాకు జ్ఞాపకం కొరిగిన్నే ఇంకా జేతందుకు తంకు అవకాసం కలిగికిరి అచ్చి.

16 ఈనె తంకె ఇంక స్రేస్తమైలా దెసా బులి పరలోకసంబంమైలా దెసాకు కొరిగిల్లీసె. సడసంగరె సెయ్యె తంకె పురువు బులిగిత్తందుకు పురువు తంకు కోసం లజ్జొపొడిని కైంకిబుల్నే తంకోసం గుటె పట్నము సిద్ధిపర్చికిరి అచ్చి.

17 పురువు వాగ్దానము కొరిలా అబ్రాహాముకు తా జొర్నైలా జొన్నె పో కు బలిదేబులి మగిలాబెల్లె సెయ్యె తాకు జొర్నైలా ఏకైక పోకు బలిదీతె సంతోసముగా ఒప్పిగిచ్చి.

18 ఈనె పురుషు తానంగరె ఇస్సాకువలరె తొత్తె జొర్నెలా సంతానంవల్లరె కలిగిలాటాక మియ్యి వాగ్దానం కొరిలా సంతానం ఊసి బులి కొయిసి.

19 పురుషు మొర్తిల్లాలింకంకా జీపించితందుకు సక్తిగల్గాటబులికిరి జనిలాటెలా అబ్రాహాము తా పో యీలా ఇస్సాకుకు మొర్నొత్తీకిరి బుల్లికిరి దీసి.

20 విస్వాసముసంగరె ఇస్సాకుకు జరగవలిసిలా సంగతీనె వినయమైకిరి యాకోబుకు ఏసావుకు ఆసీర్వదించిసి.

21 విస్వాసముసంగరె యాకోబు మొర్నొ కలో అగరె యోసేపు పోనె జొనెజోనుకు ఆసీర్వదించికిరి తా అత్తొబడ్డి మొదలు ఉంపరె ఆనిగీకిరి పురుషుకు పూజించిసి.

22 యోసేపు తాకు మొర్నొ కలో అయిలాబెల్లె విస్వాసముసంగరె ఇస్రాయేలు పోనె ఐగుప్తుకు సడదీకిరి జెవ్వరో గురించి కొతాలక్కిరి తా అన్తికానె తంకె సంగరె దనిజాండిబులి ఆజ్ఞాపించిసి.

23 మోసే జొర్నెలాబెల్లె తా మా బో సె సన్నిపిల్లకు బొల్లెరొవురో దిక్కిరి విస్వాసముసంగరె రొజాజ్జుకు నాడొరొకుంటా తింటమసోనె తాకు నుచ్చిదీసె.

24 మోసే బొట్ట యీలాబెల్లె విస్వాసముసంగరె రొజారొ జో రొ పో బులి కొయిగితె ఇస్టపాడిలానీ.

25 కుండె కలో పాపబోగము అనుబవించువురొకన్నా పురుషురో మానమానెదీకిరి కొస్టానె అనుబవించువురో బొట్టబులిగిచ్చి.

26 ఐగుప్తురో పలియ సంపద అల్లా అనుబవించువురొకన్నా క్రీస్తుకోసం గొప్ప అవమానం పొందితె బొట్టబులి, అగురుకు పొందిగివ్వొలిసిలా బహుమానం కోసం ద్రుస్తిరెదీగీకిరి యాకిరి కొయిసి.

27 విస్వాసము సంగరె మోసే నాదిగదిల్లా పురుషుకు దిక్కుంటా స్తిరమైలాబుద్ధికలిక్కిరి రొజా ఆజ్ఞకు నాడొరికిరి ఐగుప్తుకు సడదీకిరి బాజీసి.

28 ఇస్రాయేలురో తొలిచూరు పిల్లాసుకు మొర్నొదూత నామొరదీకుంటా విస్వాసమునంగరె పస్కాకు ఆచరించికిరి సే రొగుతోకు ద్వారాలుకు మక్కిసె.

29 విస్వాసమునంగరె తంకె ఆరిజిల్లా నేలంపరె సలిలాపనికిరాక గొర్ర సొంద్రొతికిరి సలిగీకిరి బాజీసె. ఐగుప్తులింకె సాకిరికొరితెజేకిరి బుడ్డిజీసె.

30 విస్వాసమునంగరె సత్రదినోజాంక ఎరికో పట్నం చుట్టూ బుల్లెలా తరువాతరె యెరికో గోడానె కూలిజీసె.

31 విస్వాసమునంగరె రాహాబు బుల్లా దర్నింట దెసాకుపరిసీలింబిలాలింకు సమాదానంగా నుచ్చిదిల్లందరె అవిదేయులైలాలింకెదీకిరి నాననించుకుంటా తప్పించబొడిసి.

32 ఇంక కెడ కొయిమంచి? గిద్యోనుకు, బారాకు, సమ్సొను, యెఫ్రా, దావీదు, సమూయేలు తంకు గురించి ప్రవక్తానె గురించి వివరించితందుకు సమయం చాలిని.

33 తంకె విస్వాసముదీకిరి రాజ్యాలుకు జయించిసె. నీతికార్యమునెకు జరిగించిసె. వాగ్దానాలుకు పొందిగిచ్చె. సింహాలురో తుండొనె బుజ్జిపించిసె.

34 నియ్యకు రొల్లా బలము చల్లార్చిసె. టీకిలి బుసానెకు తప్పించిగిచ్చె. బలహీనునెగా రొయికిరి బలపర్చబొడిసె. యుద్ధంరె పరాక్రమసాలులైసె. సత్రుసేనలుకు పొక్కదీసె.

35 విస్వాసందీకిరి మొట్టానె మొర్నిజిన్నె తంకలింకు పునరుత్థానమువలరె ఇంకా పొందిగివ్వె. ఇంకాకుండెలింకె యీనె ఇంకా స్త్రోమైలా పునరుత్థానము పొందిగిమ్మాసిబులికిరి విడుదల కావాలిబులి కొరిలాని.

36 ఇంక కుండె లింకె అవమానాలుకు, కొరడామడ్డొనె ఇంకా బందకాలుకు కైదికు అనుబవించిసె.

37 పొత్తొనె సంగరె మరిపించిసె, రంపాలుసంగరె కట్టిపించిగిచ్చె, సోదింపబొడిసె, కడ్గము సంగరె మొరిదీపించిగిచ్చె, గొర్రె చొమ్మొనె

మేక చొమ్మోనె పొగ్గీకిరి, దరిద్రులుగా రొయికిరి కొన్ఱొనె పొడికిరి హింసించబొడిసె,

³⁸ బొనొరె పొరొణొపరె గొరొనెరె బూమి తొల్లె రొల్ల సొరంగమురె బుల్లికుంటా అచ్చె. సాలింకు యే లోకొ యోగ్యమైకిరి నీ.

³⁹ అంకె అల్లా విస్వాసముసంగరె సాక్సం కడిగిల్లాలింకె ఈనెను, అంకె పురువుసంగరె వాగ్దానపలము అనుబవించినారె.

⁴⁰ కైంకిబుల్నే అమె నీకుంటా తంకె సంపూర్నునె యీనాసి బులి పురువు అం కోసము ఇంక న్నీస్థమైలాటకు అగరాక సిద్ధపర్చిసి.

12

అం బో యాల పురువు

¹ ఎత్తె గొప్ప సాక్సినమూహం అం చుట్టూ ఆవరించికిరితల్లందుకు తేలికగా చిక్కునె దిల్లా పాపముకు నడదీకిరి, అం అగరె రొయిదిల్ల పందెమురె ఓపికదీకిరి దొమిడిమా.

² విస్వాసముకు కర్తైకిరి నడకు కొనసాగించిలా యేసు ఆడుకు దిక్కుంటా, సెయ్యె అమె అగరె రొయిదిల్ల ఆనందం కోసం అవమానముకు లెక్కనాకొరుకుంటా సిలువుకు సహించికిరి పురువు సింహాసనంరొ బత్తోకైలా అత్తో ఆడుకు ఆసీనుడు యీకిరి అచ్చి.

³ తొమె నాఅలిసికిరి తొం పొర్నొనె నావిసుకుపొడికుంట రొల్లపని పాపాత్ములు తాకు వ్యతిరేకముగా కొరిలాంచకు సహించిగిల్లాటకు గురించి ఆలోచించోండి.

⁴ తొమె పాపము సంగరె పొరాడుటరె రొగొతొ గొలిలాపన ఇంక నడకు ఎదురించిలానీ.

⁵ పురువు తా పొనె జో నె సంగరె కొతాలగినె ప్రొత్సాహపరిచిలా కొతానె పసిరిజిసోనా?

మో పో ప్రబువు కొరిలా సిక్సకు నాత్తునికరించికిరి

సెయ్యె తొత్తె హెచ్చిరించిలాబెల్లె విసిగితెనా.

⁶ కైంకి బుల్నే ప్రబువు సెయ్యె

ప్రేమించిలా పతీలింకు సిక్సించికిరి

తాకు స్వీకరించిలా ప్రతీ పోకు సరికొరుసి.

7 సిక్సావలము పొందితె తొమె నహించిలీసా. పురువు పోనెపనాక తొముకు దిగిలీసి. బో నాసిక్కించిలా పో కేసైనా అచ్చెనా?

8 పో యాలాలింకె అల్లా సిక్సరె పాలుపొందిలీసె, తొమె నాపొందినె పొదర్లింకాక గాని పోనె నీ.

9 ఈనె దే సంబందులైకిరి బోనె తంకు సిక్సంచిలాపన అచ్చె. తంకె బిత్తెరె డొరొబీతి కలిగికిరి అచ్చొ సాకిరి ఈనె ఆత్మానెకు బో యిలా తాకు మరి బడే లోబొడికిరి జీమంచి నీ!

10 తంకె కుండె దినోనె తాకు యిష్టము యాలబెల్లె అముకు సిక్కించెనె గాని అమె తా పరిసుద్దతరె పాలుపొందిమంచిబులి అం మేలు కోసమాక సెయ్యె సిక్కించిలీసి.

11 ఈనె ఉంచెనె సొబ్బిసిక్స బాదగా దిగదూసి సంతోసముగా దిగిదిన్నీ. ఈనె తాండె అబ్యాసము కలిగిలాలింకు నడ నీతిబులి సమాదానమైల పలాలు దూసి.

పురువురొ క్రుపకు నాఅంగీకరించిలాలింకు హెచ్చరిక

12 ఈనె అలిసిజిల్లా అత్తొనె నీరసించిజిల్లా మోకాల్లుకు బలపరచొండి.

13 ఈనె సొట్టగొడ్డొ నా బెనుక్కుంటా బొల్లెయిజిల్లా నిమిత్తము తొం గొడ్డొనుకు బట్టొనె తిన్నగా కొరిగొండి.

14 సొబ్బిలింకె సంగరె సమాదానముగా పరిసుద్దత కలిగిరొయితందుకు ప్రయత్నించొండి. పరిసుద్దత నీకుంటా కేసె ప్రబువుకు దిగినింతె.

15 తొమె కేసెయినెను పురువురొ క్రుపకు నా పొందికుంటా తప్పుజూసుకివో బులి చేదు యాలా సెరొ కిరయినెను తొంబిత్తరె మొలిచికిరి బడేలింకె అపవిత్రానె యాజోసా కీవో దిగ్గొండి,

16 గుటె పూట కద్దికోసం తా జ్యేష్ఠత్వపు హక్కు బిక్కిలా ఏసాపుపనా దైవబీతినీలా దర్నిట పనాట అచ్చెకివో బులి జాగర్తగ దిగ్గొండి.

17 ఏసాపు సే తరువాత బో పక్కరె ఆసిర్వాదము కడిగిమంచి బులి అంకినెరె పని నడదీకిరి కెత్తో స్రద్దసంగరె కుజ్జనన్నా సెయ్యె

మారుమనుసు పొందితె అవకాసం మిల్లాని సెయ్యె సడదీసి బులి తొముకు తెలుసు.

18 * తొమె ఇస్రాయేలులింకె అత్తో సంగరె సుంగీకిరి తెలిసిగిల్లవన, పుడ్డితల్లానియ్య, వొందారొ కమ్మిల మెగొకు సంగరె ఆక్రమించిలా, తుపానుకు కమ్మిల సీనాయి పొరొతో పక్కు అయిలానీ.

19 బూరసబ్బముకు, కొతానె సబ్బముకు తొమె అయికిరినింతొ. నే సబ్బము సునిలాలింకె మరి కే కొతా కొయినాసి బులి బతిమాలిగిల్లీసె.

20 కైంకిబుల్నే తంకె నే కొయిలా ఆజ్ఞానెకు సునితె తట్టిగిన్నారెసె ఇంకా నే పొరొతోకు సుంగిల్లా జంతువుయినెనూ పొత్తొనె సంగరె మరికిరి మొరదిమ్మాసి.

21 ఈనె సడ దిగితే కెత్తో బయంకరముగా రొల్లందరె మోసే మియ్యి కెత్తో డొరిజేకిరి వొనికిలింబి బులిసి.

22 ఉంచినెనె తొమె అయిలాట, సీయోను బుల్లా పొరొతోకు జీవం కలిగిలా పురువురొ పట్నము బుల్లా పరలోకపు యెరూసలేముకు హొజారొజారు కొల్లీ దేవదూతానె పక్కు అయిసా.

23 పరలోకమురె రాసికిరి రొల్లా పురువురొ అగరొ పొరొ సంగముకు, తంకె మహోత్సవముకు సొబ్బిలింకూ న్యాయాదిపతి యాలా పురువు పక్కరకు సంపూర్ణస్తితి పొందిలా నీతిమంతునెరొ ఆత్మానె పక్కరకు అయిసు,

24 నోనింబందనకు మొజిరెమనమైలా యేసుపక్కరకు హేబెలుకన్నా ఇంకా స్రేష్టముగా పలికిలా వొలికించిలా రొగుతో పక్కు తొమె అయికిరి అచ్చొ.

25 తొముకు బుద్ధి కొయిలాలింకు ఎదురునాకొయికుంటా దిగ్గిండి. తంకె బూమంపరె తీకిరి బుద్ధి కొయిలాలింకు కొత నాసునుకుంటా తప్పించిగిన్నె పరలోకం దీకిరి బుద్ధికొయిలాటకు విసర్జించిలా అమె తప్పించిగిన్నారొ బుల్లాట మరి సొత్తాకనీనా.

* 12:18 నిర్గమకాండము 19, 16-22 20, 18-21 ద్వితీయో 4, 11, 12 5, 22-27

26 సెల్లె సెయ్యె సబ్బము బూమికి కదిలించిసి ఈనె ఉంచినె మియ్యి ఇంకగుటె సారి బూమికు మాత్రమాకనీ గని మెగొకూడ కదిలించిమి బులి కొతాదీసి.

27 “ఇంకగుటె బెల్లె” బుల్లా కొతా కెడ కొయిలీసి బుల్లె, కదిలించినార్లాంచ మిగిల్లాపనికిరి, కదిలించబొడిలంచకు బుల్లె స్రుస్టించబొడిలాంచకు కడిపెవురాక.

28 నడవల్లరె అమె నిచ్చలమైలా రాజ్యము పొందిగీకిరి, పురువుకు ఇస్టమీలపన తాకు హెచ్చించుకుంటా డొరొసంగరె క్రుతజ్ఞతలు చెల్లించిమండి.

29 కైంకిబుల్లె అం పురువు దహించిలా నియ్యెకిరి అచ్చి.

13

పురువుకు ఇస్టమైలా బొల్టనేవ

1 క్రీస్తురె అన్నబయినె అప్పబొయినీనె పనికిరి జొనుకు జొనె ప్రేమించిగిండి.

2 ఆతిద్యము కొరువురొ పసిరిజితెనాండి నడవలరె కుండెమంది నాజనికిరి దేవదూతానెకు ఆతిద్యం దీసె.

3 తొమె తంకె సంగరె బందింపబొడిలాపనాక బందకమురొల్లలింకు జ్ఞాపకము కొరిగిండి. తొమె స్రమలై అచ్చొబులిగీకిరి, ఈనె స్రమలై రొల్లాలింకు జ్ఞాపకము కొరిగిండి.

4 బ్యా సొబ్బి వినయాలై గనమైలాట, గొయిత, నెయిపొ దీలింకె జొనంపరె జొనె నమ్మకంగా రొమ్మంచి. నీతినీలాలింకు దర్పిపైటికొరిలాలింకు పురువు తీర్పు దూసి.

5 పలియాసనీకుంటా తొముకు కలిగిలాటదీకిరి త్రుప్తిపొందిగిండి తొత్తె కేమాత్రము సడిదిన్నీ, తొత్తె కెబ్బుకూ ఎడబాసినీ బులి సెయ్యె కొయిసి.

6 ఈనె ప్రబువు మెత్తె సాయం కొరిలాట.

మియ్యి డొరినీ

మెత్తె కేసైనెను కిడకొరిపారె?

బులి బొల్ల దైర్యముదీకిరి కొయిపారి.

7 తొముకు పురువురో వాక్యము బోదించికిరి, తోవుంపరె బొడిలింకెగా రొల్లలింకు జ్ఞాపకము కొరిగీకిరి, తంకె మొర్నొజాంక తంకరో జీవించిలా ప్రవర్తనపలముకు స్రద్ధగా తలంచిగీకిరి తంకె విస్వాసముకు అనుసరించొండి.

8 యేసుక్రీస్తు కాలె, ఆజి గుటెపనాక అచ్చి కెబ్బుకు గుటెపనాక తాసి.

9 బడెరకాలుయిలా పొదరో బోదసంగరె తొం బట్టోదీకిరి నాబుల్లిజాండి. కద్దివల్లరె నీకుంటా, క్రుపసంగరె హ్రుదయము బొల్లెకొరిగెనె బొల్లెకద్దినెవల్లరె ప్రవర్తించిలాలింకు కిచ్చి ప్రయోజనము కలిగిలానీ.

10 యూదునెరో ప్రార్థన చోటురె సేవ కొరువురో యాజకూనెకు అమె బలిపీటము ఉంపరె అర్పించిలాట కైతె అదికారము నీ.

11 ఉంచినెజాంక పాపపరిహారార్థచోటురె యూదు ప్రదానయాజకుడు పనువుల రొగొతో దన్నెలిసె, సె జంతువుల కలేబరమునె గుడారము దోరె పుడ్డిపీలీసె.

12 నడవల్లరె యేసుకూడ తా రొగొతో సంగరె మనమానెకు పరిసుద్దం కొరితె పట్నం దోరె కొస్తాపొడిసి.

13 ఈనె అమె తా నింద పొడికిరి బరించిగీకిరి గుడారము దోరకు తా పక్కు జెమ్మా.

14 స్తీరమైలా పట్నము అముకు బూమంపరె నీ గాని అయితల్లా పట్నం కోసం ఎదురు దిగిలించొ.

15 ఈనె తా సంగరె అమె పురువుకు కెబ్బుకు స్తుతియాగము కొరిమా బులి తా నామముకు ఒప్పిగిల్లా జిబ్బొపలము అర్పించించొ.

16 బొల్లకొరువురో, జొనుకు జొనె సాయం కొరువురో తొమె పసిరిజేతేనాండి. సాకిరి కొరువురో తాకు ఇస్త్తమైలా బలి.

17 తొం ఉంపరె నాయకులుగా రొల్లాలింకె లెక్క ఒప్పుకొయిలాలింకెపసికిరి తొం ఆత్మానెకు జొగిలీసె తంకె బాదసంగరె

నే పైటి కొర్నే తొత్తె ప్రయోజనమునీ గని ఈనె బాదసంగరె నీకిరి ఆనందము సంగరె కొరిలాపనికిరి తంక కొతా సునికిరి తంకు లోబొడికిరి రోండి.

18 అం కోసం ప్రార్థనకొరండి అమె సొబ్బి వినయమురె యోగ్యముగా ప్రవర్తించిలాపని బొల్ల మనస్సాక్కి కలిక్కిరి అచ్చొ.

19 ఈనె మియ్యి మరి బేగా తొ పక్కు అయిలాపనికిరి బడే ప్రార్థన కొరుబులి తొముకు బతిమాలిగిల్లించి.

దండము, ఆకరు కొతానె

20 అం గొప్ప జోగులొతాయీలా యేసు బుల్లా అం ప్రబువు నిత్యమైలా నిబందన సంబందమైలా రొగొతొవల్లరె మొర్నొదీకిరి ఉటిలా సమాదానకర్తెలా పురువు.

21 ప్రతీ బొల్లవినయమురె తా చిత్తప్రకారము కొరితందుకు తొముకు సిద్ధపరిచిమాసి. యేసు క్రీస్తుద్వారా తాకు అనుకూలమైలాంచకు తొబిత్తరె జరిగించిలీసి. యేసుక్రీస్తు ద్వారా యుగయుగములుకు మహిమ కలిగిమాసి.

22 అన్నబయినె అప్పబొయినీనె తొమె, ఈనె యే హెచ్చరిక కొతా సహించిగిండి తొముకు బతిమాలిగిల్లించి. సడకాక యెడకు బొడ్డాట కొరిలాని.

23 అం అన్నబయిల తిమోతికు విడుదల కలిగిసి బులి తెలిసిగిండి సెయ్యె బేగా అయిలాబెల్లె తా సంగరె అయికిరి తొముకు దిగుంచి.

24 తొమంపరె నాయకులైలాలింకల్లా పురువురొ మనమానెకు మో దండము కోండి. ఇటలీలింకంకా తొముకు దండమూనె కొయిలీసి.

25 క్రుప తొ సొబ్బిలింకు తొడ్డికిరి రొమ్మాసి.

సాత్త్వ పురుషురొ పవిత్రొ కొత
The Holy Bible in the Reli language of India: సాత్త్వ
పురుషురొ పవిత్రొ కొత (Bible)

copyright © 2023 The Word for the World International and Relli Translation Samiti, Vishagapatnam, Andra Pradesh

Language: Relli (Reli)

Contributor: The Word for the World South Asia

సాత్త్వ పురుషురొ పవిత్రొ కొత
నో నిబంధన, 2023

The New Testament in Relli Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-06-26

PDF generated using Haiola and XeLaTeX on 26 Jun 2025 from source files dated 26 Jun 2025

46416fd4-e5d1-555f-9e24-8bbc94e50bd9